

Ocho aspirant Agent di Polis a huramenta

ORANJESTAD(AAN)-- Ayeramainta durante huramentacion di ocho aspirant agent di polis, Comisario di Polis di Aruba sr. Peterson den su discurso a duna di conoce, cu pa di dos biaha e aña aki e tin e honor di por a presenta cu orguyo y satisfaccion un grupo di arubiano hoben na nos comunidad.

Despues di un estudio intenso na e school di Polis e agente policialnan ta bay presta huramento den man di Minister di Justicia bao di e bandera di Aruba cu Dios como testigo cu nan lo sigui e leynan di nos pais y cu nan lo mantene nan tambe.

Segun Comisario Peterson, esaki sigur lo no ta un tarea facil, mirando e factor cu tur dia durante nan funcion, nan mester confronta e conducto desaprobante di nos prohimo.

Y esaki pues ta nifica cu e cuerpo policial Aruba nombra pa ley mester ta conciente cu e enpeno di e personal mester ta optimal.

Semper e mando policial tin e tarea di keda mantene atencion pa asina durante servicio practico e puntonan aki haya mas empuhe pa no laga ningun clase di inclaridad.

E miembronan di cuerpo policial arubano mester realiza tur ora den cualkier situacion cu nan lo haya nan mes cu nan tarea sagrado.

Sr. Peterson a sigui bisa na tur esnan cu a huramenta, cu awe cu boso a huramenta, cu Dios todo poderoso como testigo ta acepta un encargo cu ta dificil.

Boso mester keda corda ariba e huramento pasobra por yega un dia cu boso mester duna cuenta di razon.



Laga e huramento ta e base pa boso trabao, boso mester aplica

e leynan cu ta existi den Aruba y instancia di persona y boso mester obedece esun cu den servicio policial ta para riba

boso segun ley.

Boso tin cu haci tur cos cu un bon polis mester haci pa segura e orden, tranquilidad y siguridad den nos comunidad.



Ayeramainta sr. Ivan Kelie y sr. Erwin Lampe a huramenta como ambtenaar dilanti di Minister di Justicia Edgard "Watty" Vos den presencia di comisario di polis Roland Peterson.